



## Павелай еврейнүүдтэ бэшэһэн хандалга

*Хүбүүгээрээ дамжуулһан Бурханай Үгэ*

**1** <sup>1</sup> Урдандаа Бурхан лүндэншэдөөр дамжуулжа элдэб аргаар, олон удаа манай үбгэ эсэгэнэртэ үгэ хэлэдэг байгаа. <sup>2</sup> Харин һүүлшын эдэ үдэрнүүдтэ тэрэ Хүбүүгээрээ дамжуулан бидэндэ үгэ хэлэжэ байна. Бурхан Хүбүүнэйнгээ ашаар замбуулин дэлхэйе бүтээжэ, бүхы юумые залгамжалхаар тэрэнээл шэлэжэ абаа гээшэ.

<sup>3</sup> *Бурханай алдарай туяа сасаруулан,  
Бурханай шанар шэнжэтэй байжа,  
тэрэ бүхы замбуулин дэлхэйе  
өөрынгөө үгын хүсөөр баридаг.  
Бүхы хүн түрэлхитэниие нүгэлнүүдһэнь сүлөөлэн,  
огторгой дээрэ һүр жабхаланта Бурханай  
баруун гарынь болоо.*

<sup>4</sup> *Бурханай Хүбүүнэй нэрэ түрэ  
Эльгээмэлнүүдэй нэрэ түрэнөө аргагүй шухала юм,  
тиин Хүбүүн өөрөөшье Эльгээмэлнүүдһээ холо дээгүүр юм.*

*Бурханай Хүбүүн Эльгээмэлнүүдһээ дээгүүр юм*

<sup>5</sup> «Ши минии Хүбүүмни гээшэш. Мүнөөдэр би шинии Эсэгэшни болооб», – гэжэ Бурхан өөрынгөө Эльгээмэлнүүдэй нэгэндэньше хэлээ аал? «Би тэрэнэй Эсэгэнь болохоб, тэрэ минии Хүбүүн болохо», – гэжэ Бурхан нэгэшье Эльгээмэл тухай хэлээ аал? <sup>6</sup> Тиихэдэ Бурхан өөрынгөө ууган Хүбүүе газар дэлхэй руу эльгээжэ байхадаа: «Бурханай бүхы Эльгээмэлнүүд тэрээндэ мүргэхэнь болтогой», – гэжэ хэлээ бэлэй. <sup>7</sup> Харин Эльгээмэлнүүд тухай: «Бурхан өөрынгөө Эльгээмэлнүүдые һалхин болгоно, өөрынгөө зарасанарые галай

дүлэн болгоно», – гэжэ Бурхан хэлээ бэлэй. <sup>8</sup> Гэхэдэ Хүбүүн тухайгаа Бурхан: «Ай Бурхан, шинии хаан түрэ хэтэдээ оршохо, ши арад зоноо үнэн зүбөөр захиржа байхаш. <sup>9</sup> Ши үнэн зүбтэ дуратайш, зүгөөр ёһо гуримые эбдэхэдэ ехэ дурагүй байдагши. Тиимэ-һээ Бурхан, шинии Бурхан, шамаые шэлэжэ абаад, нүхэдһөөшни дээгүүр табиба, тиихэдэнь ши ехэл баяртай байбаш», – гэжэ хэлээ бэлэй.

<sup>10</sup> Тэрэ үшөө иигэжэ хэлээ юм: «Ши, Дээдын Эзэн, анха түрүүн газар дэлхэйе бүтээгээ бэлэйш. Өөрынгөө гараар огторгой тэнгэриие байгуулааш. <sup>11</sup> Тэдэ бүтээһэн юумэнүүдшни хүнэхэ, харин ши үлэхэш. Тэдэ юумэнүүдшни хубсаһан мэтэ үмхирхэ. <sup>12</sup> Ши тэдэниие хубсаһандал адли эбхэхэш, хубсаһандал мэтэ һэлгэхэш. Харин ши өөрөө хододоо хэбээрээ байхаш, тиин үдэрнүүдшни дууһахагүй».

<sup>13</sup> Бурхан өөрынгөө Эльгээмэлнүүдэй нэгэндэньшые: «Шинии дайсадые улан дорошни оруултарни ши эндэ, баруун таладамни һуу», – гэжэ хэлээгүй бэлэй. <sup>14</sup> Тиихэдээ Бурханай Эльгээмэлнүүд хэд гээшэб? Тэдэ Бурханда алба хэжэ, абарагдаха ёһотой хүнүүдтэ туһалхаар Бурханай эльгээһэн хүлдэнүүд гээшэ.

**2** <sup>1</sup> Тиимэһээ урасхалда абтахагүйн тула бидэ дуулажа абаһан юумээ хатуугаар сахижа байха ёһотойбди. <sup>2</sup> Манай үбгэ эсэгэнэртэ Эльгээмэлнүүдээр дамжуулан хэлэгдэһэн Бурханай үгэ үнэн зүб байгаа. Тиин тэрэ үгы баримталаагүй, али үгы хаа дуулаагүй хүн хүртэхэ ёһотойл хэһээлтэдэ хүртэдэг байгаа. <sup>3</sup> Тиимэ агууехэ абаралгые тоонгүй, бидэ хэһээлтэһээ яажа зугадаха гээшэбибди? Дээдын Эзэн энэ абаралга тухай анхан өөрөө айладхаа юм. Тэрэниие дуулаһан хүнүүд абаралга болбол үнэн юм гэжэ бидэндэ баталан хэлээ бэлэй. <sup>4</sup> Бурхан тэрэ гэршэлгэдэ элдэб янзын гайхамшагта үзэгдэлнүүдые болон дүлгэ тэмдэгүүдые нэмэн харуулжа, өөрынгөө һайн дураар Нангин Хүлдэ хайрлажа байгаа.

<sup>5</sup> Бидэнэй дурдаһан шэнэ газар дэлхэйе захиржа байхаар Бурхан Эльгээмэлнүүдые табяагүй юм. <sup>6</sup> Харин Нангин Бэшэгэй нэгэ газарта: «Хүн гээшэ юун бэ, яагаад тэрэниие ши мартахагүй байнабши? Хүнэй хүбүүн юун бэ, яагаад ши тэрэниие анхарнабши? <sup>7</sup> Ойро зуура тэрэниие ши Эльгээмэлнүүдһээ доогуур байлгааш. Тэрэндэ алдар соло, нэрэ түрэ олгоош, бүтээһэн бүхы юумэнэйнгээ захирагшаар табяаш. <sup>8</sup> Бүхы юумые тэрэнэй мэдэлдэ үгөөш», – гэжэ бэшээтэй байдаг.

Бурхан «бүхы юумые тэрэнэй мэдэлдэ үгөө» гэхэдээ, хүнэй мэдэлдэ хамаг юумэ үгөө гэхэн удхатай юм. Тиихэдэ бидэ хүнэй бүхы юумэ мэдэлдээ оруулаад байһыень үшөөл харанагүйбди. <sup>9</sup> Харин ойро зуура Эльгээмэлнүүдһээ доогуур табигдаад, Бурханай үршөөл хайраар бүхы хүнүүдэй түлөө үхэһэн Иисусые бидэ харанабди. Үхэлые дабажа гараад, алдар солодо ба нэрэ түрэдэ тэрэнэй хүртэһые бидэ мүнөө харанабди. <sup>10</sup> Бурхан бүхы юумэ бүтээгөө, бүхы юумэн тэрэнэй тула оршодог. Тэрэ олон үхибүүдые алдар солодоо хүртөөхэ ханаатай байгаа. Тиимэхээ хүнүүдые абаралгада Хүтэлжэ байһан Иисусые Бурхан зоболон дабуулаад, эрхим түгэс болгоо.

<sup>11</sup> Арюудхагша ба арюудхагдаһан бүхы хүнүүд нэгэ Эсэгэтэй юм. Тиимэхээ Иисус тэдэниие аха дүүнэрни гэжэ нэрлэхээ эшэдэггүй. <sup>12</sup> Иисус: «Би аха дүүнэртээ шинии хэһэн бүхы юумэн тухай хөөрөжэ үгэхэб, тэдэнтэй уулзахадаа би шамайе алдаршуулхаб», – гэжэ Бурханда хэлээ бэлэй.

<sup>13</sup> Тэрэ үшөө: «Би Бурханда найдажа байхаб», «Бурханай намда даалгаһан үхибүүдтэй би мүнөө эндэ байнаб», – гэжэ хэлээ.

<sup>14</sup> Үхибүүдэй махабад бэе ба шуһанһаа бүридэһэн хадань Иисус өөрөө тэдэнтэйл адли хүн болоо. Үхэлые эрхэ мэдэлдээ абаад байһан шолмосые өөрынгөө үхэлөөр хүнөөхын тула, <sup>15</sup> үхэлһөө айжа бүхы наһаараа барлагууд байһан хүнүүдые сүлөөлхын тула тэрэ тиимэ юумэ хэһэн байгаа. <sup>16</sup> Дээдын Эзэн үнэндөө Эльгээмэлнүүдые дэмжэжэ байгаа бэшэ, харин Абраһамай үри һадаһые дэмжэжэ байгаа. <sup>17</sup> Найдабаритай ба үршөөл хайратай Ахамад Санаарта болоод, бүхы хүнүүдэй нүгэлнүүдыень хүлисүүлхын тула Бурханда алба хэжэ байхадаа өөрынгөө аха дүүнэртэй адли болохо ёһотой байгаа юм. <sup>18</sup> Тэрэ өөрөө туршуулжа, зоболон эдлэһэн юм хадаа мүнөө туршалгада ороһон хүнүүдтэ туһалха аргатай юм.

*Иисус Моисейһээ дээгүүр юм*

**3** <sup>1</sup> Бурханай баһал өөртөө дуудаһан арюун нангин аха дүүнэрни! Баримталжа байһан хүзэгэймнай Ахамад Санаарта болгогдон эльгээгдэһэн Иисус тухай ханажа байгты. <sup>2</sup> Бурханай гэртэ ажаллажа байхадаа Моисей ямар үнэн сэхэ, шударга байгша һэм, тон тиигэжэл Иисус энэ ажалые хэжэ байхаар шэлэжэ абаһан Бурхандаа үнэн сэхэ байгаа юм. <sup>3</sup> Гэр бариһан хүн гэрһээ үлүү нэрэ түрэдэ хүртэдэг. Тон тиигэжэл Иисусһые Моисейһээ үлүү ехэ алдар солодо хүртэхэ ёһотой юм. <sup>4</sup> Бүхы гэрнүүдые ямар нэгэ хүн барья, харин

бүхы юумые Бурхан баряа. <sup>5</sup> Моисей Бурханай гэртэ зарасадал адли найдабаритай байхадаа, Бурханай ерээдүйдэ хэлэхэ юумые гэршэлэн хэлэхэ ёһотой байгаа. <sup>6</sup> Харин Христос тэрээндэ ороходоо Бурханай гэртэ байһан Хүбүүндэл адли найдабаритай юм. Өөһэдынгөө этигэжэ байһан зориг ба найдабари хадагалжа байбал, бидэ тэрэнэй гэрынь болохобди.

<sup>7-11</sup> «Үбгэ эсэгэнэртнай сүл губида ябахандаа Бурхание туршажа, үймөө татаа һэн. Дүшэн жэл соо Бурханай юу хэжэ байһыень хаража байһаншье һаа, тэдэнэр Бурхание тэндэ шалгаба, туршаба. Тиимэхээ Бурхан тэдэ зондо сухалаа хүрэжэ: „Тэдэнэр ходо эндүүржэ ябадаг, харгы замаарни ябадаггүй“, – гэжэ хэлэһэн байна. Бурхан уур сухалаа хүрэхэдөө: „Амаруулха гэхэн газартаа тэдэниие хэзээшье оруулхагүйб“, – гэжэ тангариглаһан байна. Тиимэхээ таанад Бурханай дуу дуулахадаа, үбгэ эсэгэнэртэйгэйл адляар зүрюу зан бү гаргагты», – гэжэ Нангин Һүлдэ хэлэнэ.

<sup>12</sup> Аха дүүнэрни, амиды Бурханһаа холодохогүйн тула таанад булта нүгэлгүй, этигэлтэй байхые оролдожо байгты. <sup>13</sup> Таанадай хэн нэгэнэй нүгэлөөр хорхойтуулагдан дошхорхогүйн тула, Нангин Бэшэгтэ бэшээтэй «мүнөөдэр» гэдэг үгын маанадта хандажа байхада, та бэе бэе үдэр бүхэндэ урмашуулжа байха ёһотойг. <sup>14</sup> Хэрбээ бидэ эхилһэн амидаралаа һүүл болоторнь хатуугаар баримталжа байбал, Христосто хабаатай болонобди.

<sup>15</sup> Нангин Бэшэг соо: «Таанад мүнөөдэр Бурханай дуу дуулахадаа, Бурханай урдаһаа үймөө татаһан үбгэ эсэгэнэртээл адли зүрюу зан бү гаргагты», – гэжэ хэлэгдэһэн байдаг. <sup>16</sup> Бурханай дуу дуулаһаншье һаа, урдаһаань үймөө татаһан хүнүүд хэд байгаа? Тэдэнэр булта Моисейн хүтэлбэри доро Египедһээ гараһан хүнүүд байгаа. <sup>17</sup> Ямар хүнүүдтэ Бурхан дүшэн жэлэй туршада сухалдажа байгаа? Нүгэлдэ унажа, сүл губида үхэхэн хүнүүдтэ бэшэ аал? <sup>18</sup> «Амаруулха гэхэн орондоо тэдэниие хэзээшье оруулхагүйб», – гэжэ Бурхан тангариглажа байхадаа, хэд тухай хэлэжэ байгаа? Урдаһаань үймөө татаһан хүнүүд тухай хэлэжэ байгаа ха юм. <sup>19</sup> Этигэл хүзэггүй байһанайнгаа түлөө тэдэ хүнүүдэй Бурханай амаруулха гэхэн орондо орожо шадахагүй байһыень бидэ харабди.

**4** <sup>1</sup> Тэрэ найдуулһан амаралтадань хүртэнгүй үлэшэхэгүйн тула бидэ булта болгоомжотой байха ёһотойбди. <sup>2</sup> Сүл губяар ябаһан зондол тон адли бидэ Һайн Мэдээсэл дуулажа абаһан байгаабди.

Тэдэнэр Бурханай үгые дуулаһаншые хаа, хайн болоогүй юм. Ушарын хэлэхэдэ, тэдэ Бурханай үгые шагнажа байхадаа, тэрэ үгыень этигэл хүзэгтэйгээр тогтоожо абаагүй. <sup>3</sup> Харин бидэ, хүзэглэһэн хүнүүд, Бурханай найдуулһан амаралтадань хүртэжэ байнабди. «Уур сухалдаа би тэдэниие амаруулха гэхэн газартаа хэзээшые оруулхагүйб гэжэ тангариглаһан байгаа», – гэжэ тэрэ өөрөө хэлээ.

Газар дэлхэйе бүтээхэ саһаа хойшо тэрэ ажалаа гүйсэдхэһэншые хаа, тиигэжэ хэлэһэн байгаа. <sup>4</sup> Нангин Бэшэг соо долоодохи үдэр тухай иигэжэ бэшээтэй: «Хэжэ байгаа ажалаа Бурхан долоодохи үдэртөө дүүргэжэ, хэжэ байгаа бүхы ажалнуудһаа долоодохи үдэртөө Бурхан амарба ха». <sup>5</sup> «Тэдэниие амаруулха гэхэн газартаа хэзээшые оруулхагүйб», – гэжэ тэндэ баһа бэшээтэй байдаг. <sup>6</sup> Хайн Мэдээсэл түрүүн дуулаһан хүнүүд этигэлгүй байһан хадаа амаралтада хүртээгүй. Тиин тэрэ амаралтада хүртээгүй зон үшөө байна. <sup>7</sup> «Мүнөөдэр» гэгдэдэг ондоо үдэрые Бурханай шэлэһыень тэрэ харуулна. Нилээд сагай үнгэрһэн хойно тэрэнэй Давидаар дамжуулан хэлэһэниинь Нангин Бэшэг соо үгтэнхэй байдаг: «Таанад мүнөөдэр Бурханай дуу дуулахадаа зүрхэ сэдхэлээрээ бү дошхорогты».

<sup>8</sup> Хэрбээ Бурханай найдуулһан амаралтые Навинай Иисусай үгэһэн байбал, Бурхан тэрэнэй һүүлдэ ондоо үдэр тухай хэлэхэгүй бэлэй. <sup>9</sup> Гэхэтэй сасуу Бурхан өөрынгөө хүнүүдтэ субботын амаралтын үдэрые амалаа юм. <sup>10</sup> Бурханай найдуулһан амаралтада хүртэһэн хүнүүд өөрынгөө хэрэгүүдһээ амаржа байһан Бурхандал адли баһал хэрэгүүдһээ амаржа байха. <sup>11</sup> Этигэлгүй байһанайнгаа тула унаһан тэдэ хүнүүдтэл адли нэгэмнайшые унангүй, тиимэ амаралтада хүртэхын тула бүхы шадалаараа шармайе.

<sup>12</sup> Бурханай үгэ амиды ба хүсэтэй юм, хоёр талаһаан хурсалуулагдаһан ямаршые эриһээ хурса юм. Тэрэнь хүнэһэ һүүлдэ хоёрой уулзалта, бүридэл болон уураг тархи, алишые юумэн хүрэтэр хүрэдэг. Тэрэ зүрхэнэй хүсэлэн ба бодолнуудые шиидхэжэ байдаг. <sup>13</sup> Бурханһаа далда, нюуса юумэн гэжэ үгы. Харин бүхы юумэн тэрэнэй харасада элиржэ, нээгдэжэ байдаг. Тиин бидэ булта тэрээндэ өөһэд тухайгаа тоосоо үгэхэ ёһотой гээшэбди.

*Иисус бодото Ахамад Санаарта юм*

<sup>14</sup> Бидэ Бурханай дэргэдэ байһан Бурханай Хүбүүн Иисус гэдэг агуухэ Ахамад Санаартатай ха юмди. Тиимэһээ өөһэдынгөө шүтэжэ байгаа хүзэг этигэлые хатуугаар сахижа ябаял. <sup>15</sup> Манай Ахамад

Санаарта бидэнэй ядаруу тулюур байдал тухай ханаагаа зобонгүй ябажа шадахагүй. Тэрэ бидэндэл тон адли бүхы талааа туршуулхан байбашье, нэгэшье нүгэл хээгүй юм. <sup>16</sup> Тиин бидэ зоригжожо, буян хэшэгтэй Бурханай хаан шэрээдэ ойртожо үзээл даа. Бидэ маанатал туна болохо хэмжээгээр тэндэ үршөөл хайрада хүртэжэ, буян хэшэг олохобди.

**5** <sup>1</sup> Хүнүүдэй дундааа шэлэгдэжэ абтахан ямаршье ахамад санаарта хүнүүдэйл аша туһада Бурханда алба хэхээр табигдадаг. Тэрэ санаарта хүнэй нүгэлые хүлисүүлхэ гэжэ Бурханда тахил тахидаг, үргэл асардаг. <sup>2</sup> Тэрэ өөрөө олон дутагдалнуудтай ушарһаа эндүүржэ, алдуу хэжэ байһан хүнүүдые хүлисэдэг юм. <sup>3</sup> Тиимэхээ тиимэ ахамад санаарта гансал хүнэй хэһэн нүгэлнүүдэй түлөө бэшэ, харин өөрынгөө нүгэлнүүдэй түлөө баһал үргэл үргэхэ ёһотой байдаг. <sup>4</sup> Хүн өөртөө ахамад санаартын нэрэ хүндые олгодоггүй, харин Аарондол адли Бурханай уряалаар ахамад санаарта болодог. <sup>5</sup> Тон тиигэжэл ахамад санаартын нэрэ хүндые Христос өөрөө өөртөө зүүгээгүй, харин «Ши минии Хүбүүн гээшэш. Мүнөөдэр би шинии Эсэгэшни болооб» гэһэн Бурхан тэрээндэ ахамад санаартын нэрэ түрые үгөө юм. <sup>6</sup> Нангин Бэшэг соо нүгөө газарта Бурхан: «Мелхиседегэй табиханаар ши хэтын хэтэдэ санаарта болоод байхаш», – гэжэ хэлэнэ. <sup>7</sup> Газар дэлхэй дээрэ амидаржа байхадаа, тэрэниие абарха аргатай Бурханда Иисус шангаар хүхирэн, нулимсаа гоожуулан зальбараа, тэрэниие гуйгаа. Иисусай номгон, үнэр шударга байһан хада Бурхан тэрэниие дуулаа һэн. <sup>8</sup> Бурханай Хүбүүн байһаншье һаа, зоболонгуудые дабан тэрэ хүнэй үгөөр байжа һураа. <sup>9</sup> Эрхим түгэс болоходоо, тэрэ үгыень дууладаг бүхы хүнүүдэй мүнхын абаралгын эхиниинь болоо. <sup>10</sup> Тиигээд Мелхиседегэй заяаһанаар Бурхан тэрэниие ахамад санаарта болгожо табяа юм.

*Этигэл хүзэгөө урмашуулха тухай*

<sup>11</sup> Энэ талаар бидэ олон юумэ хэлэхэ байгаабди, гэхэтэй хамта таанадай ойлгосо доройтоһон тула тайлбарилжа үгэхэмнай ехэл бэрхэшээлтэй байна. <sup>12</sup> Саг хугасаагаар багсаахада таанад багшанар болоод байха байгаат, харин Бурханай Үгын түрүүшын хэшээлнүүдые таанадта дахин дабтаха хэрэгтэй болоод байна. Хатуу хоол барихын орондо таанад хүгөөр ундалха болонот. <sup>13</sup> Хүгөөр тэжээлгэжэ байһан хүн бүхэн үнэн зүбые, буруугай ушарые илгaha туршалгагүй

үхибүүн гээшэ. <sup>14</sup> Хатуу хоол бээе хүсэхэн хүнүүдэй эдеэн юм. Тэдэ хүнүүд туршалга дадалгатай хадаа хайн, муу хоёрые илгаха аргатай байдаг.

**6** <sup>1-2</sup> Христосой хургаалай түрүүшын хэшээлнүүдые хойноо орхижо, урагшаа дабшаял. Хэрэггүй ажалнуудаа орхижо, Бурханда хүзэглэхэ, уһаар арюудхаха болон гараараа адислаха тухай, үхэхэн хүнүүдэй амидырха, хэтын зарга шүүбэри тухай хургаалай нуури дахин табиha хэрэггүй. <sup>3</sup> Бурханай зүбшөөбэл, бидэ энэниие бээлүүлхэбди.

<sup>4</sup> Хүзэг этигэлээ алдаһан хүнүүд яаж дахин гэм хэхээ болёод, Бурханда хандахаб? Тэдэнэр нэгэ үедэ Бурханай гэрэл туяада ябаа, тэнгэрийн бэлэг абажа, Нангин Хүлдые тогтоожо абаһан байгаа. <sup>5</sup> Тэдэнэр өөһэдынгөө туршалгаһаа Бурханай үгэ хайн гэжэ мэдээ, ерээдүйн зуун жэлүүдэй хүсэ шадал мэдэжэ абаа. <sup>6</sup> Тиибэшье тэдэнэр хүзэг этигэлээ алдаа. Тэдэниие дахин нүгэлһөөнь Бурханда хандуулха аргагүй юм. Юундэб гэхэдэ, тэдэнэр Бурханай Хүбүүе дахин хэрээһэндэ хадажа, тэрэниие хүнүүдэй урда гутааха ха юм.

<sup>7</sup> Оло дахин орожо байһан бороогой уһаар уһалагдаад, эдлэжэ байгаа эзэдтээ аша туһатай ургаса үгэжэ байһан газар Бурханай үршөөлдэ хүртэнэ. <sup>8</sup> Харин тиихэдэ хашаг болон буртаг үбһэ ургуулһан газар юундэшье хэрэггүй, Бурханай хараалда арай хүртөөгүй, галда шатаагдаха хойшолонтой байдаг.

<sup>9</sup> Инаг хайрата нүхэдни, маанадай иигэжэ хатуугаар хэлэжэ байһаншье хаа, таанад үлүү хайн нүхэсэлдэ байнат, тиимэхээ абарагдахат гэжэ найданабди. <sup>10</sup> Бурхан болбол найдабаритай үнэн сэхэ юм. Тэрэ хэхэн хэрэгүүдыетнай, бусад хүзэглэгшэдтэ туһалһан, мүнөөшье туһалан, өөртөн үзүүлһэн хайра дурыетнай мартахагүй.

<sup>11</sup> Таанадай найдажа байһан юумэнэй үнэн зүб байхын тулада таанадай хүн бүхэн эсэстэ хүрэтэрөө зүдхэмжэтэй байһай гэжэ хүсэнэбди.

<sup>12</sup> Таанадые залхуурангүй, хүзэг этигэлтэй, тэсэбэритэй байгаад, Бурханай найдуулһан юумые хүлэжэ абадаг хүнүүдтэл адли байхыетнай хүсэнэбди.

<sup>13</sup> Бурхан Абраһамые найдуулхадаа, найдуулһанаа бээлүүлхэб гэһэн дашаа тангариг үгэхэн байгаа. Өөрһөөнь дээгүүр хүнэй үгы юм хада Бурхан өөрынгөө нэрээр тангариглаһан байгаа. <sup>14</sup> «Би шамайе үршөөл хайрадаа хүртөөхэб, олон үри хадаһадые шамда хайрлахаб гэһэн үгөө үгэнэб», – гэжэ Бурхан Абраһамда хэлээ бэлэй. <sup>15</sup> Абраһам ехэл тэсэбэритэй байжа, Бурханай найдуулһанда хүртэхэн

байгаа. <sup>16</sup> Бидэ тангариглахадаа өөһэдһөө ехэ дээгүүр хүнөөр тангаригладагбди, тиин тангариг ямаршые арсалдаа заргалдаае үгы хэдэг юм. <sup>17</sup> Найдуулһан юумыень абаха ёһотой байһан хүнүүдтэ эрхэ хүсэлөө хубилгахагүй байһанаа элээр харуулхын тулада Бурхан найдуулгаа тангаригаараа баталһан байгаа. <sup>18</sup> Бурханай худалаар хэлэжэ болохогүй, хубилдаггүй хоёр юмэн бии юм. Тиимэһээ бидэ урдманнай оршожо байһан найдуулга хатуугаар адхаад, ехэтэ урмашажа, Бурхантай хамтархадаа хоргодохо газар олобобди. <sup>19</sup> Тэрэ найдалга манай амиин бархагтал мэтэ юм. Тэрэ найдалга аюулгүй, бата, тэнгэрийн хүмын хүшэгэй саагуур досоонь ородог юм. <sup>20</sup> Тиихэдэ Иисус бидэнэй аша туһада урдманнай тишээ ороод, Мелхиседегэй заяаһанаар хэтын хэтэдэ ахамад санаарта болоо бэлэй.

*Христос мүнхэдөө бодото ахамад санаарта юм*

**7** <sup>1</sup> Мелхиседек болбол Салимай хаан, Дээдын Бурханай санаарта байгаа юм. Абраһамай дүрбэн хаашуулые дараад, дайнаа бусажа ябахадань, Мелхиседек тэрээнтэй ушаржа үршөөл хайрадаа хүртөөгөө бэлэй. <sup>2</sup> Тиин Абраһам байһан юмэнэйгээ арбанай нэгэн хубиие Мелхиседегтэ үгэһэн байгаа. (Мелхиседегэй нэрын нэгэ удха болбол «үнэн сэдхэлэй хаан»; тиихэдэ Салимай хаан байһан хадань тэрэнэй нэрэ үшөө «энхэ тайбанай хаан» гэһэн удхатай). <sup>3</sup> Тэрэ эхэ эсэггүй, угай бэшэггүй; тэрэнэй түрэхэн гү, али үхэхэн тухай гэршэлгэ байдаггүй. Тэрэ Бурханай Хүбүүндэ тон адли, мүнхэдөө санаарта байха юм.

<sup>4</sup> Тэрэнэй агуухэ байхые таанар харагты. Манай үбгэ эсэгэ Абраһам дайнда олзолһон бүхы юмэнэйнгээ арбанай нэгэ хубиие тэрээндэ үгэһэн байгаа. <sup>5</sup> Санаартадаар табигдаһан Левиин үри һадаһад Хуулиин ёһоор баһал Абраһамай үри һадаһад байһан өөрынгөө аха дүүнэрһээ, Израилиин арад түмэнэй олзын арбанай нэгэ хубиие суглуулха эрхэтэй. <sup>6</sup> Мелхиседек болбол Левиин үри һадаһан бэшэшые һаа, Абраһамһаа арбанай нэгэ хубиень абаад, Бурханай найдуулгада хүртэхэн тэрэ Абраһамые үршөөл хайрадаа хүртөөгөө. <sup>7</sup> Үршөөлдөө хүртөөжэ байһан хүнэй үршөөгдэжэ байһан хүнһөө үлүү дээгүүр байһаниинь арсашагүй. <sup>8</sup> Эндэ арбанай нэгэ хубиие суглуулжа байдаг санаартад үхэлтэ хүнүүд юм, харин тэндэ арбанай нэгэ хубиие абаһан Мелхиседек амиды гэжэ гэршэлэгдээтэй юм. <sup>9</sup> Абраһамай арбанай нэгэ хубиие түлэхэдэ, Левийшые (үри һадаһадынь арбанай нэгэ хубиие суглуулдаг) өөрөө баһал түлөөһэ үгэһэн



болоно. <sup>10</sup> Мелхиседегэй Абраһамтай уулзахада Левий үшөө түрөөгүй, харин үбгэ эсэгэ Абраһамайнгаа досоонь байгаа гэжэ хэлэхэдэ болоно.

<sup>11</sup> Израилиин арадта үгтэһэн Хуулиин ёһоор левидүүд санаартан болоо. Хэрбээ левидүүд түгэс түгэлдэр санаартад байбал, Аароной табиһанаар бэшэ, харин Мелхиседегэй заяаһанаар ондоо санаартын гаража ерэхын хэрэг үгы һэн даа. <sup>12</sup> Санаарталгын ээлжэлгэ хубилбал, Хуулииншые тогтоолнууд хубилгагдаха ёһотой байдаг. <sup>13</sup> Бидэнэй дурдаһан Дээдын Эзэн ондоо обогой хүн байгаа, тиин обогойнь нэгэшые хүн санаартын алба гүйсэдхэдэггүй бэлэй. <sup>14</sup> Дээдын Эзэн болбол Иудын обогой гэжэ һайн мэдээжэ юм. Санаартад тухай асуудал хүндэхэдөө Моисей энэ обог тухай юушые хэлээгүй һэн.

<sup>15</sup> Мелхиседегтэл адли ондоо санаартын бии болоһониинь эндэһээ бүри элээр харагдана. <sup>16</sup> Тэрэ Хуулиин ёһоор гү, али тогтоолоор бэшэ, харин дууһашагүй амидаралай хүсөөр санаарта болоо юм. <sup>17</sup> «Мелхиседегэй заяаһанаар ши хэтын хэтэдэ санаарта байхаш», — гэжэ Нангин Бэшэг соо хэлэгдэнэ. <sup>18</sup> Хуушан тогтоол бираггүй, аша туһагүй байһан дээрэһээ мүнөө хүсэгүй болгогдонхой. <sup>19</sup> Моисейн Хуули ямаршые юумые эрхим түгэс болгоогүй. Тиимэхээ маанадай Бурханда ойртохын тула мүнөө бүри һайн найдуулга үгтэнэ.

<sup>20</sup> Тиихэдэ үшөө Бурханай тангариг үгтөө. Ондоо хүнүүдэй санаарта болоходо Бурхан тиимэ тангариг үгөөгүй һэн. <sup>21</sup> Харин Иисус болбол Бурханай тэрэндэ үгэһэн тангаригай ёһоор санаарта болоо юм: «Дээдын Эзэн „Ши хэтын хэтэдэ санаарта байхаш“ гээд тангариглаа юм, тиин хэлэһэн үгөө бусаажа абахагүй».

<sup>22</sup> Энэ илгаа Иисусые баһал бүри һайн хэлсээнэй найдабари болгоно.

<sup>23</sup> Ондоошые илгаа байгаа: бусад санаартад үхэдэг ушарһаа ехэ олон байгаа. <sup>24</sup> Харин Иисусай мүнхэ амидаржа байһан хадань тэрэнэй санаартын албан баһа мүнхэ юм. <sup>25</sup> Тиимэхээ зоние үргэлжэ абаржа байха аргатай тэрэ санаарта хэтын хэтэдэ амиды байжа, тэрээгүүр дамжан Бурханда ерэхэн хүнүүдэй түлөө Бурханай урда гуйдаг юм.

<sup>26</sup> Үнэндөө Иисус маанадтал хэрэгтэй Ахамад Санаарта юм. Тэрэ болбол арюун нангин; харата хэрэгүүдые үйлэдөөгүй, нүгэл шэбэлдэ унаагүй; нүгэлтэ зонһоо илгаруулагдаад, тэнгэридэ дэгдүүлһэн байгаа. <sup>27</sup> Ондоо ахамад санаартадтал адли түрүүн өөрынгөө нүгэлнүүдэй түлөө, һүүлдэнь арад зоной нүгэлнүүдэй түлөө үдэр бүхэн

үргэл асарха тэрээндэ хэрэггүй. Тэрэ нэгэтэ, тиихэдэ хэтын хэтэдэ өөрыгөө үргэл болгон үргөө. <sup>28</sup> Моисейн Хуули дутагдалнуудтай хүнүүды ахамад санаартаар табидаг, харин Хуулийн хүүлдэ үгтэһэн Бурханай тангариг хододоо эрхим түгэс Хүбүүниие ахамад санаартаар табья юм.

*Христос болбол Шэнэ Хэлсээнэй дамжуулагша ба  
Ахамад Санаарта юм*

**8** <sup>1</sup> Хэлэжэ байһан юумэнэймнай гол удха: бидэ тэнгэридэ Үндэр дээдэ түрэлтын баруун талада һууһан Ахамад Санаартатайбди. <sup>2</sup> Тэрэ болбол хүнүүдэй гараар бариһан бэшэ, харин Дээдын Эзэнэй бодхоохон бодото майханда, хамагай нангин газарта ахамад санаартынгаа үүргэ гүйсэдхэжэ байна.

<sup>3</sup> Ямаршы ахамад санаарта Бурханда үргэл асархаар, тахил тахихаар табигдадаг юм, тиин манайшы Ахамад Санаарта үргэхэ юумэтэй байха ёһотой. <sup>4</sup> Хэрбээ тэрэмнай газар дэлхэй дээрэ байбал, санаарташы бэшэ байха һэн, юундэб гэхэдэ, газар дэлхэйн санаартад Хуулийн ёһоор лэ үргэлнүүды асардаг юм. <sup>5</sup> Тэдэ санаартад ажалаа хэхэдэ үнэн дээрээ тэнгэрийн юумые һажаана, тэнгэрийн юумэнэй хүүдэрын лэ болоно. Тиимэл юумэн Моисейтэй тохёолдоо һэн. Тэрэнэй майханаа татаха гэжэ байхада, Бурхан тэрээндэ: «Хада дээрэ шамда харуулагдаһантайл адляар бүхы юумые хэ», – гэжэ хэллэ бэлэй. <sup>6</sup> Үлүү һайн найдуулга дээрэ үндэһэлһэн Бурханай болон тэрэнэй хүнүүдэй хоорондохы Иисусаар дамжаһан хэлсээн хэды ехэ һайн гээшэб. Тон тиигэжэл Иисуста мүнөө тэдэ санаартадта ороходоо бүри эрхим түгэс албан тушаал үгтөө.

<sup>7</sup> Хэрбээ түрүүшын хэлсээн дутагдалгүй байбал, хоёрдохы хэлсээнэй хэрэг үгы байха һэн даа. <sup>8</sup> Зүгөөр Бурхан арадаа зэмэлэн, иигэжэ хэлэбэ: «Израилиин арадтай болон Иудын арадтай шэнэ хэлсээн баталха үдэрнүүд ерэжэ байна гээд Дээдын Эзэн хэлэнэ. <sup>9</sup> Энэ хэлсээн тэдэнэрэй үбгэ эсэгэнэрые гарһаань хүтэлэн Египедһээ гаргаха гэһэн үдэр тэдэнтэй баталһан хэлсээндэл адли бэшэ байха. Үбгэ эсэгэнэрын минии хэлсээе сахидаггүй байгаа, тиимэһээ би тэдэниие тоохоёо болёоб. <sup>10</sup> Тэдэ үдэрнүүдэй хүүлдэ Израилиин арадтай баталха хэлсээн иимэ: хуулинуудаа тэдэнэй һанал бодолдо оруулхаб, зүрхэ сэдхэлдэнь бэшэхэб. Би тэдэнэй Бурханиинь болохоб, тэдэнэр минии арад болохо гэжэ Дээдын Эзэн хэлэнэ. <sup>11</sup> Тэдэнэй хэнииньшы Дээдын Эзэниие мэдэ гэжэ нүхэдөө гү, али

аха дүүнэрээ хургахагүй, юундэб гэхэдэ, тэдэ бултадаа багаһаа агуу-ехэ хүрэтэрөө намайе мэдэжэ байха. <sup>12</sup>Тэдэнэй нүгэлнүүдые би хүлисэхэб, худал хуурмагыень дахин хануулхагүйб».

*Христос эрхим түгэс тахил юм*

<sup>13</sup>Шэнэ хэлсээн тухай хэлэхэдээ Бурхан түрүүшын хэлсээнэй хуушарһые харуулаа, тиихэдэ хуушаржа ба үмхиржэ байһан юумэн мэнэ гэхээр лэ хүнэн халадаг.

**9** <sup>1</sup>Түрүүшын хэлсээн мүргэл тухай тогтоолтой, мүргэлөө хэхэ нангин газартай байгаа. <sup>2</sup>Майханай нэгэдэхи таһалгые Нангин Газар гэжэ нэрлэдэг бэлэй. Досоонь зула, шэрээ дээрэ Бурханда үргэгдэһэн хилээмэн табяатай һэн. <sup>3</sup>Хоёрдохи хүшэгэй саана Хамагай Нангин Газар байгаа. <sup>4</sup>Досоонь алтан шэрээ дээрэ угадаг сан хүжэ, бүхы талаһаан алтаар хушагдаһан Хэлсээнэй абдар, тэрээн соо маннатай\* алтан домбо, набшалжа байһан Аароной таяг, захяа заабари хиилэгдэнхэй шулуун хабтагайнууд байгаа. <sup>5</sup>Абдарай хаабарин, абаралгын газарай дээгүүр тэнгэрийн амитад бии һэн. Мүнөө дээрээ энээн тухай тодорхойгоор хэлэһэнэй хэрэггүй.

<sup>6</sup>Энэ бүхэн ямар ёһо гуримтай байбаб гэбэл, санаартад үдэр бүхэн өөһэдынгөө алба хэхээ майханай гадаада таһалгада ородог байгаа, <sup>7</sup>харин майханай дотоодо таһалгада жэлдээ нэгэл дахин гансал ахамад санаарта ородог бэлэй. Ахамад санаарта ороходоо өөрынгөө түлөө, арад зоной нүгэл хэжэ байнабди гэжэ мэдэрэнгүй хэжэ байһан нүгэлнүүдэйн түлөө Бурханда үргэхэ шуһа абажа ородог байгаа. <sup>8</sup>Майханай гадаада таһалгын байха үедэ Хамагай Нангин газарта орохо харгы хаалгаатай байнал гэжэ Нангин Һүлдэ элээр харуулна. <sup>9</sup>Энэ болбол мүнөөнэй үе сагые зураглаһан бэлгэ тэмдэг болоно. Бурханда үргэгдэжэ байһан үргэл тахилнууд мүргэл хэжэ байһан хүниие гүйсэд абарха аргагүй гэхэн удхатай юм. <sup>10</sup>Энэнь Бурханай шэнэ тогтоол зарлаха үе саг хүрэтэр эдихэ, ууха, янза бүрийн арюудхалга сэбэрлэлгын гадна талын заншалнуудтай холбоотой шухала бэшэ юумэнүүд байгаа.

<sup>11</sup>Харин Христос ерээдүйн хайн хайханай Ахамад Санаарта болон ерээ. Тэрэнэй алба хэжэ байһан майхан бүри ехэ, улам хайхан юм, тэрэ майхан хүнүүдэй гараар бүтээгдээгүй, тиймэһээ зохёон

---

\* Тэнгэрийн хилээмэн.

бүтээгдэһэн энэ газар дэлхэйн хубинь бэшэ. <sup>12</sup> Христос майханда нэгэтэ ороходоол Хамагай Нангин газарта хэтын хэтэдэ ороо, тиин тэрэ тэхын гү, али буха буруугай шуһа тахил болгон абажа ороогүй, харин өөрынгөө аминай ба шуһанай сэнгээр нүгэлнүүдыемнай арилгаа. <sup>13</sup> Хэрбээ бузарлагдаһан хүнүүд дээрэ тэхын гү, али бухын шуһа, шатааһан үнөөнэй үнэхэ сасахадань, тэрэ хүнүүдэй бузарынь арилгагдадаг юм бол, <sup>14</sup> Христосой шуһан бузарнуудыень бүрин түгэс арилгадаг юм. Тэрэ мүнхын Һүлдөөр дамжуулан өөрыгөө Бурханда үргөө. Тэрэнэй шуһань сэдхэлыемнай дэмы хэрэгүүдхээ арилгаад, амиды Бурханда алба хэхэ аргатай болгохо.

<sup>15</sup> Бурханай уряалһан хүнүүд Бурханай найдүүлһан мүнхын үршөөлдэ хүртэхэ. Христос түрүүшын хэлсээнэй хүсэн түгэлдэр байхадань хүнүүдые үйлэдэһэн нүгэлнүүдхээн сүлөөлөөд, Шэнэ хэлсээ баталха боломжо олгобо.

<sup>16</sup> Эдэ хүрэнгэ залгамжалхын тула һүүлшын захяа үгтэдэг. Тиимэ һүүлшын захяа байбал, тэрэ захяа орхихон хүнэй үхэл баталһан гэршэлгэ хэрэгтэй. <sup>17</sup> Һүүлшын захяа орхихон хүнэй амиды байбал, тэрэ захяань юуншые бэшэ, харин тэрэ хүнэй үхэхэн лэ хойно һүүлшын захяа хүсэндөө ородог. <sup>18</sup> Тиимэхээ адхарһан шуһаар баһа түрүүшын хэлсээн баталагдаа. <sup>19</sup> Моисей түрүүн бүхы арад зондо захяа заабаринуудые Хуулийн ёһоор тайлбарилан айлагдаад, тиигээд бухануудай ба тэхэнүүдэй шуһые уһантай худхаад, иссопой мүшэрөөр ба улайлаһан нооһоор тэрэ шуһаараа Хуулийн ном болон бүхы арад зониие сасаба ха. <sup>20</sup> «Энэ шуһан Бурханай танда заяаһан хэлсээ батална», – гэжэ Моисей хэлэбэ. <sup>21</sup> Моисей тон тиигэжэл Майханиие болон мүргэлдэ хэрэглэгдэдэг амһартануудые шуһаар сасаһан байгаа. <sup>22</sup> Үнэндөө Хуулийн ёһоор бүхы юумэн шуһаар лэ арюудхагдадаг, тиимэхээ шуһа адхаруулангүй нүгэл сагааруулжа болоогүй хэн.

<sup>23</sup> Тэнгэридэхи юумые дуряаһан юумэнүүд тиигэжэ арюудхагдаха ёһотой байгаа. Тиигэхэдэ бодото тэнгэрийн юумэн бүри һайн тахилаар арюудхагдаха ёһотой. <sup>24</sup> Бодото юумые һажаан хүнэй гараар бүтээһэн Нангин Газарта Христос ороогүй юм. Тэрэ мүнөө манай орондо Бурханай урда зогсохын тулада тэнгэридэ өөртэнь ороо юм. <sup>25</sup> Тиихэдэ иудейн ахамад санаартын Хамагай Нангин газарта жэл болгон ондоо амитанай шуһа абаад ородогтол адляар өөрыгөө оло дахин тахил болгожо байхаар Христос тэнгэридэ ороогүй юм. <sup>26</sup> Тиигээгүй һаа, тэрэ газар дэлхэйн зохёон бүтээгдэхэхээ эхилээд оло

дахин зобохо бэлэй. Үе сагай эсэстээ хүрэжэ байхада тэрэ өөрыгөө тахил болгон үргөөд, нүгэлые усадхахаар нэгэтэл, гэхэдэ хэтын хэтэдэ ерээ юм. <sup>27</sup> Хүн бүхэн нэгэтэ үхөөд лэ, удаань зарга шүүбэридэ орохо ёһотой. <sup>28</sup> Тон тиигэжэл Христос олон зоной нүгэлнүүдые хүлисүүлхээр өөрыгөө нэгэтэ үргэл болгон асараа бэлэй. Тэрэ хоёрдохиёо нүгэлнүүдые арилгахаяа бэшэ, харин тэрэниие хүлэжэ байһан зоние абархаяа ерэхэ.

**10** <sup>1</sup> Иудейн Хуули болбол бодото юумэнүүдэй тон зүб хэбынь бэшэ, харин хайн юумэнүүдэй һүүдэрынэ лэ гээшэ. Жэлһээ жэлдэ, хододоо нэгэ адли амитадые тахил болгон үргэжэ, Бурханда ерэжэ байһан хүнүүдые Хуули яжа эрхим хайн болгохоб. <sup>2</sup> Хэрбээ Бурханда мүргэл хэжэ байһан хүнүүдэй нүгэлнүүдынэ үнэхөөрөө хүлисэгдэһэн байгаа һаа, тэдэ хүнүүд нүгэлтэйбди гэжэ өөһэдэ-гөө тоолохоёо болёод, тахил үргэхээ болихо һэн лэ. <sup>3-4</sup> Бухануудай болон тэхэнүүдэй шуһа хүнүүдэй нүгэлнүүдые хэзээдэшые арилгажа шадахагүй юм. Тиимэһээ тэдэниие жэл бүри үргэл болгожо асардаг. Тиигээд тэдэ тахилнууд хүнүүдтэ нүгэлнүүдыеһэн хануулаад байдаг.

<sup>5</sup> Тиимэһээ Христос энэ газар дэлхэйдэ ерэхэдээ, Бурханда иигэжэ хэлээ юм: «Ши үргэлнүүдые үргүүлхэ болон тахилнуудые тахиулха дурагүй байнаш. Тиихэдэ намда махабад бэе олгоош. <sup>6</sup> Нүгэлнүүдые арилгаха гэжэ үргэлэй шэрээ дээрэ үргэгдэһэн бүтэн бүхэлээрээ шатаагдаһан амитадые, олон тахилнуудые ши хайшаагаагүйш. <sup>7</sup> „Ай, Бурхамни, Хуулида нам тухай юун гэжэ бэшээтэй байнаб, тэрэниие, шинии эрхэ хүсэлые бээлүүлхээ би ерэнэб“ – гэжэ би удаань хэлэбэб».

<sup>8</sup> «Тахил, үргэлнүүдые, үргэлэй шэрээ дээрэ шатаагдаһан амитадые, нүгэлнүүдээ арилгахын тула тахигдаһан тахилнуудыешые ши абаха дурагүй байгааш, тэдэниие хайшаагаагүйш», – гэжэ тэрэ түрүүн хэлэбэ. Эдэ бүхы тахилнуудые Хуулиин ёһоор үргэдэг байһаншые хадань, тэрэ тиигэжэ хэлээ. <sup>9</sup> «Ай, Бурхамни, шинии эрхэ хүсэлые бээлүүлхээ би ерэнэб», – гэжэ удаань тэрэ хэлэбэ. Тиихэдээ Бурхан бүхы хуушан тахилнуудые болуулжа, орондонь Христосые тахил болгон табина. <sup>10</sup> Иисус Христосой Бурханай эрхэ хүсэл бээлүүлэн өөрынгөө махабад бэеые нэгэтэ болон хэтын хэтэдэ үргэл болгон асарһан юм хадань бидэ булта нүгэлнүүдһэн мултараһан арюудхагдаһан байнабди.

<sup>11</sup> Хэдышые иудейн санаартадай үдэр бүхэн өөрынгөө алба гүйсэдхэн, нэгэ адли юумээ оло дахин тахил болгон асардаг байхадань, тэдэ тахилнуудын нүгэлнүүдые хэзээшые арилгажа шададаггүй. <sup>12</sup> Христос болбол нүгэлнүүдэй түлөө нэгэ тахил тахяд, хэтын хэтэдэ Бурханай баруун талада нуугаа. <sup>13</sup> Тэрэ мүнөө дайсадыень хүлэйн ула доро Бурханай оруулхыень хүлээжэ байна. <sup>14</sup> Нүгэлнүүдээ арилгажа байһан хүнүүдые Христос нэгэ үргэлөөрөө хэтын хэтэдэ эрхим түгэс болгоо.

<sup>15</sup> Нангин Нүлдэшые энээн тухай бидэндэ гэршэлэн хэлэнэ: <sup>16</sup> «Тэрэ үдэрнүүдэй нүүлдэ тэдэнтэй баталагдаха хэлсээн энэ байна: хуулинуудаа тэдэндэ хануулхаб, ханаа сэдхэлдэнь бэшэхэб гэжэ Дээдын Эзэн хэлэнэ. <sup>17</sup> Тэдэнэрэй нүгэлнүүдые би хүлисэхэб, харата муухай хэрэгүүдые дахин хануулхагүйб. <sup>18</sup> Нүгэлнүүдэй хүлисэгдэһэн хойно тэдэнэй түлөө дахин үргэл хэхэ хэрэггүй юм.

*Бурханай хажуудань ябаял*

<sup>19</sup> Аха дүүнэрни, Иисусай үхэлэй ашаар бидэ Нангин Газарта орохо дүүрэн эрхэтэйбди. <sup>20</sup> Тэрэ болбол хүшэгэй саагуур – өөрынгөө махабад бээер – бидэндэ шэнэ, мүнхын амидаралда хүргэдэг харгы зам нээгээ. <sup>21</sup> Бидэ Бурханай гэр хараха агуухэ санаартатайбди. <sup>22</sup> Тиимэһээ үнэн сэдхэлтэйгээр, дүүрэн хүзэг этигэлтэйгээр, бузар ханал бодолнуудһаан сэбэрлэгдэһэн зүрхэ сэдхэлтэйгээр, сэбэр уһаар угаагдаһан махабад бэтэйгээр Бурханай ойро ошоёл. <sup>23</sup> Бурхан найдуулһанаа дүүргэхэ гэжэ этигэлтэй байгаа юм хадаа этигэжэ байһан тэрэ найдуулгаяа бата баримталан ябаял. <sup>24</sup> Хүнүүдэй бэе бээдээ анхарал табижа, бэе бээдээ инаг хайраяа харуулхадань, дэмбэрэлтэй найхан юумэ хэхэдэнь туһалжа байял. <sup>25</sup> Маанадай зариман суглаагаа хаяжа ошодог заншалтай. Тиигэхээ болёод, орондонь Дээдын Эзэнэй ерэхэ Үдэрэй ойртохо туһамынь бэе бээе бүри ехээр зоригжуулжа, урмашуулжа байял.

<sup>26</sup> Үнэн зүбые мэдэрһэн хойноо бидэнэй зорюута нүгэл шэбэл хэжэ ороболнай нүгэлнүүдые арилгаха тахил дахин бидэндэ байхагүйл. <sup>27</sup> Тиимэһээ зарга шүүбэрийн болохые, Бурханда эсэргүүсэһэн хүнүүдые хүнөөхэ дошхон галые айжа байгаад хүлээхэмнай үлэнэ гээшэ. <sup>28</sup> Моисейн Хуули буруушаһан хүн хоёр гурбан хүнэй гэршэлбэл, ямаршые үршөөл хайрагүйгөөр үхэлөөр хэхээгдэдэг. <sup>29</sup> Зүгөөр Бурханай Хүбүүндэ зэбүүрхэдэг, өөһэдыень нүгэлнүүдһэнь арилгаһан Бурханай хэлсээнэй шуһые нангин юумэн гэжэ

тоодоггүй хүнүүд, үршөөл хайрын Һүлдые доромжолдог хүнүүд тэрээнһээ долоон доро хэһээлтэдэ хүртэхэ ёһотой юм! <sup>30</sup> «Би үһөөгөө абахаб, би ашыень харюулхаб», баһа «Дээдын Эзэн арад зоноо шүүхэ», – гэжэ хэлэгшые бидэ мэдэнэбди. <sup>31</sup> Амиды Бурханай гартань орохонь аймшагтай юм!

<sup>32</sup> Таанадтай урдань юунэй тохёолдоһые ханаандаа оруулагты. Бурханай гэрэл туяагай таанадые гэрэлтүүлхэдэ, таанад зоболонгуудые дабан, агуухэ баатаршалга гаргабат. <sup>33</sup> Таанадые урдань хүнүүд гомдохоодог, доромжолдог бэлэй, тиимэһээ тон тиигэжэ доромжолуулжа байһан хүнүүдые таанад хамгаалхада бэлэн байдаг бэлэйт. <sup>34</sup> Таанад түрмэдэ һууһан хүнүүдэй зоболонгые хубаалсадаг, зөөри зөөшыетнай буляжа абахадань, баяртай байдаг һэнта, юундэб гэхэдэ, таанад тэнгэридэ хэтэдээ оршодог бүри хайн зөөри зөөшэтэй байһанаа мэдэжэ байгаат. <sup>35</sup> Зоригоо бү алдагты, тиигэбэл агуухэ шагналда хүртэхэт. <sup>36</sup> Бурханай эрхэ хүсэлые бэлүүлэн, найдууһан юумыень абаха гэбэл, таанад тэсэбэритэй байха ёһотойт. <sup>37</sup> Үшөө нэгэ хэды болоод, уданшьегүй хаатангүй Заларан ерэгшэ ерэхэл. <sup>38</sup> Үнэн сэдхэлтэнгүүд этигэл хүзэгөөрөө амидаржа байха, хэрбээ хэн нэгэнэй таталзабалнь, би тэрэниие хайшаахагүйб.

<sup>39</sup> Бидэ татагалзан хосорогшод бэшэбди. Харин хүзэг этигэлтэй зомди, абарагдахабди.

#### *Һүзэг этигэл*

**11** <sup>1</sup> Һүзэг этигэлтэй байхань найдажа байһан юумэндээ бата ханалтай байха, нюдөөрөө харадаггүй юумэнүүдтэ найдажа байха гээшэ. <sup>2</sup> Һүзэг этигэлээрээ манай үбгэ эсэгэнэр Бурханай хайшаалда хүртэһэн байна.

<sup>3</sup> Һүзэг этигэлээрээ бидэ Бурханай үгөөр замбуулин зохёон бүтээгдээ гэжэ мэдэрнэбди, тиимэһээл нюдэндэмнай харагдадаг юумэнүүд харагдадаггүй юумэнүүдһээ бии болоо юм.

<sup>4</sup> Һүзэг этигэлээрээ Авель Каинһаа үлүү хайн үргэл Бурханда асарһан байгаа. Бурхан өөрөө тэрэнэй үргэлые хайшаажа, хүзэг этигэлээрнь Авелиие үнэн сэдхэлтэн байна гэжэ хайшаагаа юм. Авелиин үхэһэншье хаа, этигэл хүзэгын мүнөө хүрэтэр маанадые хургажа байна.

<sup>5</sup> Һүзэг этигэлэйнгээ ашаар Енох үхэлтэй уулзаагүй. Үнэндөө болбол Бурхан тэрэниие дээшэнь дэгдээгээ, хэншье Енохые оложо шаддаагүй юм. Дэгдүүлхынгээ урда тээ Енох Бурханай хайшаалда хүртөө

гэжэ Нангин Бэшэгтэ бэшээтэй байдаг. <sup>6</sup> Һүзэг этигэлгүй хүнүүдэй хэнииньше Бурханай найшаалда хүртэжэ шадахагүй: Бурханда ерэжэ байһан хүн Бурхан бии, тэрэниие бэдэржэ байһан хүнүүдэй ашыень тэрэ харюулха гэжэ хүзэглэжэ байха ёһотой.

<sup>7</sup> Ерээдүйдэ тохёолдохо уһан галаб тухай хэнэйше уридшалан мэдээгүй байхада Ной этигэл хүзэгөөрөө Бурханһаа һэргылэмжэ абаад, Бурханай үгөөр байжа, өөрыгөө болон өөрынгөө гэр бүлые абарха корабль барихан байна. Эсэстэнь, газар дэлхэйнхид гэмнэгдээд, Ной этигэл хүзэгөөрөө Бурханһаа үнэн сэдхэлдэ хүртэбэ.

<sup>8</sup> Бурханай үгэхэб гэжэ найдуулһан орон нютаг руу ошо гэжэ Бурханай уряалхада Абраһам этигэл хүзэгөөрөө үгыень дуулаһан байна. Хайшаашые ошохо байһанаа мэдэнгүй, тэрэ өөрынгөө орон нютагые орхёо бэлэй. <sup>9</sup> Бурханай үгэхэб гэжэ найдуулһан орон нютагта тэрэ баһал Бурханай найдуулгада хүртэһэн Исаак Иаков хоёртойгоо этигэл хүзэгөөрөө хариин хүндэл майханууд соо амидардаг һэн. <sup>10</sup> Бурханай зохёон бодхоон бата һууритай хотые Абраһам хүлэжэ байгаа.

<sup>11</sup> Абраһамай ехэ наһатай болоод, Саррын үри багагүй байһаншые хада, тэдэнэр этигэл хүзэгөөрөө үхибүүтэй болоо. Бурхан найдуулһанаа бээлүүлхэ гэжэ Абраһам ехэ этигэжэ байгаа. <sup>12</sup> Үхэхын наана болоод байһан ганса Абраһамһаа огторгойн мүшэдтэл адли, далайн эрьсын элһэндэл адли тоогүй олон үри һадаһад түрэхэн байгаа.

<sup>13</sup> Тэдэ булта этигэл хүзэгтэйгөөр наһа бараа. Тэдэнэр Бурханай найдуулһан юумэндэ хүртэнгүй үхэхэншые һаа, тэрэ найдуулгыень холоһоо хаража баясадаг бэлэй, өөһэд тухайгаа бидэ газар дэлхэй дээрэ хариин хүнүүд, ерүүл хүнүүд гээшэбди гэжэ хэлэдэг бэлэй.

<sup>14</sup> Тиигэжэ хэлэдэг хүнүүд өөрынгөө орон нютагые бэдэржэ байнабди гэжэ элээр харуулна. <sup>15</sup> Өөһэдынгөө орхижо ошоһон орон нютаг тухай тэдэнэр һанадаг байбал, һөөргөө бусажа ерэхэ аргатай байха һэн. <sup>16</sup> Харин тэдэнэр үлүү һайн, тэнгэриин орон нютагта зорижо байба. Тиимэхээ Бурхан тэдэнэй Бурханби гэхэдээ тэдэнһээ эшэдэггүй: Бурхан тэдэ зондо хото бэлдээд байна.

<sup>17</sup> Бурханай Абраһамые туршахадань, этигэл хүзэгөөрөө тэрэ Исаак хүбүүгээ тахил болгон үргөө. Бурхан Абраһамда найдуулга үгөө, тиимэхээ Абраһам ганса хүбүүгээ тахил болгон үргэхэдэ бэлэн байгаа. <sup>18</sup> «Исаагаар дамжан, ши минии үгэхэб гэхэн үри хүүгэдтэй болохош», – гэжэ Бурхан тэрээндэ хэлэбэ. <sup>19</sup> Исаагай үхэбэлнь Бурхан тэрэниие амидыруулха аргатай гэжэ Абраһам һанажа



байгаа, тийн Абрахам Исаагыг үхэлхөө бусааж абаа гэж хэлэхэд болохо.

<sup>20</sup> Исаак ерээдүйдэ этигэн, Иаков Исав хоёрыг үршөөлдөө хүртөөн байгаа.

<sup>21</sup> Иаков наһа барахынгаа урда тээ этигэл хүзэгтэйгөөр Иосифой хүбүүдыг бултынь буян хэшэгтээ хүртөөгөөд, таягаа тулажа байгаад Бурханда мүргэн байна.

<sup>22</sup> Иосиф наһа баража байхадаа, Израилиин хүбүүдтэ Египедыг орхиж ошохынь этигэл хүзэгтэйгөөр дурадхаад, шарилынь хаана табихаб гэнэн захяа орхино юм.

<sup>23</sup> Этигэл хүзэгтэйгөөр Моисейн аба эжынь хүбүүгээ түрэхэһөөнь эхилжэ гурбан һара хоргодуулжа байба. Тэдэнэр үхибүүнэйнгээ һайхан байхынь хараад, хаанай захиралтатой зүрилдэхээ айгаагүй.

<sup>24</sup> Моисей наһаяа хүсэхэдөө, этигэл хүзэгээрөө фараонтой басаганай хүбүүн гэжэ нэрлүүлхээ арсаба. <sup>25</sup> Тэрэ богони хугасаанда нүгэлтэй амидаралтай байжа аяшаахын орондо Бурханай аралтай зобохонь дээрэ гэжэ тоолобо. <sup>26</sup> Христосой түлөө зобохо гэшэ бүхы Египедэй баялигһаа үлүү ехэ баялиг гэжэ Моисей бодожо байгаа, ушарынь гэхэдэ, тэрэ ерээдүйдэ харюулха шагналаа хаража байгаа бэлэй. <sup>27</sup> Тэрэ этигэл хүзэгээрөө хаанай уур сулһаа айнгүй, Египедыг орхёо һэн. Нюдэндэ харагдадаггүй Бурханий хаража байһандал тэрэ бата хатуу байгаа һэн. <sup>28</sup> Этигэл хүзэгээрөө тэрэ Паасхын баярыг тогтоогоод, үхэлэй Эльгээмэлэй израильшуудай ууган хүбүүдтэнь хүрэнгүй үнгэрхын тула шуһаар үүдээ сасахынь арад зондоо захираа.

<sup>29</sup> Этигэл хүзэгээрөө израильшууд Улаан далайе хуурай газар мэтэл гаталба, харин египедэй сэрэгшэдэй тон тиимээр гаталжа туршахадань, уһан хана тэдэниие хушаба.

<sup>30</sup> Израильшууд долоон үдэрэй туршада Иерихонийе тойрожо ябаад, этигэл хүзэгээрөө ханануудынь унагаагаа. <sup>31</sup> Янхан эмэ Раав этигэл хүзэгээрөө израилиин тагнуулшадые һайнаар угтан абаһандаал Бурханай үгыг дуулаагүй хүнүүдтэй хамта хосороогүй.

<sup>32</sup> Үшөө юун тухай хэлэхэбиб? Гедеон, Барак, Самсон, Иеффай, Давид, Самуил, бусадшыг лүндэншэд тухай хөөрэхэдэмни саг хүрэхгүй. <sup>33</sup> Тэдэнэр этигэл хүзэгээрөө хаан оронуудыг дайлан диилэдэг, үнэн зүб юумэ хэдэг, Бурханай найдүүлһан юумэндэ хүртэдэг, арсалануудай амынь хаадаг, <sup>34</sup> галзуу гал унтараадаг, жадын эриһээ зайсадаг, һулахан бирагүй байгаад, шадалтай болодог, байлдаанда

бүхэ байдаг, хариин сэрэгүүдые дарадаг бэлэй. <sup>35</sup> Эхэнэрнүүдэй этигэл хүзэгэйн ашаар үхэхэн түрэлхидыень амидыруулдаг байгаа.

Нүгөө зариман бүри хайн амидаралда хүртэхын тулада сүлөөлэлгэһөө арсан, тамалуулагдан үхэдэг хэн. <sup>36</sup> Зарим хүнүүд доромжолуулаад, сохюулаад, баһа гэнжэндэ хүлюулээд, түрмэдэ нуудаг бэлэй. <sup>37</sup> Нүгөөдүүлын шулуугаар шэдэдэг, жүрөөгөөр хоёр болгон таһалдаг, жадаар хадхан аладаг бэлэй. Тэдэнэр хониной гү, али ямаанай арһаар бээ орёогоод, дуталдан, хашуулан мүрдүүлэн, гомдохуулан тэнэдэг байгаа. <sup>38</sup> Бүхы газар дэлхэйн хүнүүд тэдэнэй хаананьшые хүрэхэгүй! Гэхэдэ тэдэнэр сүл губяар болон хада уулаар тэнэжэ ябаа, агы нүхэнүүдтэ болон жалгануудта амидаржа байгаа.

<sup>39</sup> Этигэл хүзэгөөрөө тэдэнэр булта Бурханай хайшаалда хүртэһэншые һаа, Бурханай найдуулһан юумэндэ хүртөөгүй юм. <sup>40</sup> Ушарын юун бэ гэхэдэ, Бурхан бидэндэ үлүү хайн юумэ түлэблөөд байна. Бидэнтэйл хамта тэдэниие эрхим түгэс болгохонь Бурханай зорилго мүн.

*Эзэн Бурхан манай Эсэгэ мүн*

**12** <sup>1</sup> Маниие тойроод үүлэндэл мэтэ олон гэршэнэр байна. Тиимэһээ бидэ замдамнай хаатуулжа байһан бүхы юумэнүүдһээ, тиихэдэ бидэниие амарханаар хүлижэрхидэг нүгэлһөө сүлөөлэгдэжэ, урдамнай байһан, бидэндэ заяагдаһан замаар ябаял. <sup>2</sup> Хүзэг этигэлэймнай эхи татаһан, тэрэнииемнай түгэс түгэлдэр болгоһон Иисусые шэртэжэ байял. Ерээдүйдэ үзэгдэхэ баярай түлөө тэрэ өөрыгөө гутаалгахаяа айнгүй, хэрээһэндэ хадуулжа үхөөд, Бурханай баруун талада нуугаа.

<sup>3</sup> Нүгэлтэнүүдэй зүгһөө тэрэ аргагүй ехэ зэбүүрхэл үзэжэ, хэды ехэ зоболон дабажа гарааб гэжэ бодожо үзыт. Тиимэһээ таанад урмаа бү хухарагты. <sup>4</sup> Нүгэлтэй эсэргүүсэн тэмсэжэ байхадаа, таанад үшөө үхэтэрөө тулалдаагүй ха юмта. <sup>5</sup> Бурханай таанадые, өөһөдүнгөө хүбүүдые, урмашуулан иигэжэ хэлэһые таанад мартаа аалта? «Хүбүүмни, Эзэн Бурханай шамда юумэ захижа байхадань, анхаралаа хандуулаарай, шамайе шүүмжэлэн элирүүлхэдэнь, урмаа хухарангүй байгаарай». <sup>6</sup> Ушарын гэхэдэ, Эзэн Бурхан өөртэнь хайратай баһан хүнөөл хэһээдэг, өөрынгөө хүбүүн гэжэ тоолоһон хүнөөл сохидог юм.

<sup>7</sup> Журамтай болохын тула хэһээхэдэнь тэсэбэритэй байгты, Бурхан таанадые өөрынгөө хүбүүд гэжэ тоолоно ха юм. Эсэгынгээ

хэһээлтэдэ ороогүй ямар нэгэн хүбүүн олдохо аал? <sup>8</sup> Бүхы үхибүүдтэнь лэ адли хэһээгдээгүй юм хаа, таанад бодото хүбүүдынь бэшэт, тиимэһээ энэ ушарта Бурхан танай хуулита эсэгэ бэшэ гээшэ. <sup>9</sup> Газар дэлхэйдэхи эсэгэнэрэйнгээ маанадые хэһээхэдэ бидэ тэдэниие хүндэлдэг һэмди. Тиимэһээ бидэ тэнгэрийн Эсэгынгээ мэдэлдэнь бүрин байха ёһотой бэшэ аалди. <sup>10</sup> Газар дэлхэйдэхи эсэгэнэрнай маанадые газар дэлхэйдэхи ажамидаралаймнай түлөө өөһэдынгөө дураар хэһээдэг байгаа, харин Бурхан бидэнэй аша туһада, арюун нангин юумэндээ хүртөөхын тула бидэниие хэһээнэ гээшэ. <sup>11</sup> Хэһээлгэжэ байха үедөө бидэ баярладаггүй, харин уйдадаг зантайбди. Тиин һүүлдэнь тэрэ хэһээлтэ ухаантай болоһон хүнүүдтэ үнэн сэдхэлтэнэй амидаралай амгалан үрэ дүн асардаг юм.

*Захяа ба һэргылэмжэнүүд*

<sup>12</sup> Эсэһэн гарнуудаа дээшэнь һарбайгты, һуларһан үбдэгүүдээ бэхижүүлэгты. <sup>13</sup> Доһолон хүлтнай гэмтэнгүй, бүри эдэгэжэ байхын тулада таанад сэхэ замаар ябажа байгты.

<sup>14</sup> Хүн бүхэнтэй эбтэй эетэй байхые, арюун амидаралтай һуухые оролдожо байг, тиигээгүй хүнүүд Эзэн Бурхание харахагүй. <sup>15</sup> Хэн нэгэнэй Бурханай үршөөл хайраһаа хаһагдан үлэшэхэгүйень ойлгожо байгты. Хэн нэгэнэй хорото ургамалдал адли гэм хүргэжэ, олон хүнүүдые бузарлажа байхагүйень обёоржо байгты. <sup>16</sup> Ууган хүбүүнэй эрхые нэгэ бариха хоолоор худалдажархидаг забхай, тиихэдэ Бурханһаа холодоһон Исавтай адли хүн таанадай дунда бү байг. <sup>17</sup> Тэрэ эсэгынгээ буян хэшэгтэ хүртэхэ хүсэлэнтэй байһаншые хаа, нулимсаа гарган алдуугаа заһаха гэжэ оролдоһоншые хаа, хэһэн алдуугаа заһажа шадаагүй, тиимэһээл эсэгэнь тэрэниие угтажа абаагүй гэжэ таанад мэдэнэт.

<sup>18</sup> Израилиин арадгал адли аһажа байһан галтай Синай хадада, харанхыда, боро хараанда, шуурганда, <sup>19</sup> бүрээгэй дуугархада, дуунуудай шууяандашые таанад ерээгүйт. Хүнүүд тэрэ дуу дуулахадаа ондоо нэгэшые үгэ хэлэнгүй байхыень гуйжа байгаа, <sup>20</sup> ушарынь ямар бэ гэхэдэ, «Ан амитаншые энэ хадын хаяае гэшхэбэл үхэтэрөө шулуудуулха» гэжэ хэлэхэдэнь, тэдэ хүнүүд тэсэхэ аргагүй байгаа. <sup>21</sup> Энэ үзэгдэлэй ехэл хүртэй байһан хадань Моисейшые: «Би айн хүрдэжэ, халаганажа байнаб», – гэжэ хэлээ бэлэй.

<sup>22</sup> Таанад Синай хадада, амиды Бурханай хотодо, тэнгэрийн Иеруһалимда, үй түмэн Бурханай Эльгээмэлнүүдэй баярай суглаанда ерээт.

<sup>23</sup> Нэрэнүүдын тэнгэридэ бэшэгдэн Бурханай эгээн түрүүшын хүзэглэгшэдэй бүлгэмэй гэшүүдын болон таанад ерээт. Таанад бүхы хүнүүдэй Зарга шүүгшэ болохо Бурханда, эрхим түгэс болоһон үнэн сэдхэлтэнүүдэй хүлдэнүүдтэнь ерээт. <sup>24</sup> Таанад Авелиин сасанан шуһанда ороходоо бүри хайн юумэнүүдые үгэхөөр найдуулан Шэнэ Хэлсээ баталһан Иисусай сасагдаһан шуһанда ерээт.

<sup>25</sup> Дээдын Эзэнэй хэлэхэдэнь, шагнахагүйбди гэжэ бү арсаарайгты. Тэрэнэй газар дэлхэй дээрэ хэлэхэдэнь, шагнаһгүй өөрыень буруушаһан хүнүүд хэһээлтэһээ мултараагүй юм. Харин тэнгэриһээ хэлэхэдэнь арсабал, хэһээлтэһээ бүришье мултархагүйбди. <sup>26</sup> Урдань тэрэнэй абьяан газар дэлхэйе хүдэлгөө, харин мүнөө тэрэ: «Үшөө дахин би ганса газарые бэшэ, огторгой тэнгэриие хэлбэлзүүлхэб», – гэжэ үгөө үгэһэн байна. <sup>27</sup> Тэрэ хэлэһэниинь зохёон бүтээгдэһэн юумэнүүд сооһоо хубилгаха аргагүй юумэнүүдын үлэжэ, харин хубилгагдаха юумэнүүдын хүнэн хосорхо гэһые тайлбарилна.

<sup>28</sup> Хубилгаха аргагүй хаан ороние эзэлээд, бидэ баяр баясхалангаар дүүрэн байял. Бурханда хүндэтгэйгөөр хандан, хүгэдэн, тэрээндэ найшаагдажа баймаар алба хэжэ байял. <sup>29</sup> Ушарынь гэхэдэ, манай Бурхан үнэхөөрөө хүнөөдөг гал дүлэн гээшэ.

*Бурханда яажа найшаагдахаб*

**13** <sup>1</sup> Христосой хүзэглэгшэдтэл бэе бээдээ хайратай байгты. <sup>2</sup> Аяншадые гэртээ угтан оруулхаяа бү мартагты. Тиигэжэ зарим хүнүүд өөһэдөөшье мэдэнгүй Бурханай Эльгээмэлнүүдые гэртээ айлшалууһан байна. <sup>3</sup> Түрмэдэ һуһан хүнүүд тухай тэдэнтэй суг хаагдаһан мэтэл ханажа байгты. Зобожо байһан хүнүүдтэй адли зоболсон, тэдэндэ ханаагаа табижа байгты.

<sup>4</sup> Гэр бүлэ бүхы талаһаа үнэн сэхэ байг, үбгэн һамган хоёр бэе бээдээ шударга байг. Бурхан забхай ба ташаяаралдадаг зоние гэмнэхэ юм.

<sup>5</sup> Алта мүнгэндэ шунангүй, бии юумээрээ сэдхэл дүүрэн байгты. Ушарынь гэхэдэ, «Би шамайе хээээшье орхихогүйб, би шамайе хээээшье хаяхагүйб», – гэжэ Бурхан хэлээ. <sup>6</sup> Тиимэһээ: «Бурхан минии туһалагша гээшэ, би айхагүйб. Хүн намда юу хэжэ шадахаб?» – гэжэ бидэ зоригтойгоор хэлэхэбди.

<sup>7</sup> Таанадта Бурханай үгэ хэлэдэг байһан хүтэлэгшэдөө ханагты. Тэдэнэй яажа амидаржа, яажа наһа бараһыень хараад, этигэл хүзэгыень нажажа ябагты. <sup>8</sup> Тэрэ этигэл хүзэгынь болохо Иисус Христос

үсэгэлдэр, мүнөөдэршые, хэтын хэтэдэ хубилхагүй юм. <sup>9</sup> Тиимэһээ элдэб янзын хургаалнууднаа зайсан, үнэн зүб замаар ябагты. Эдэе хоол тухай гуримуудые сахихые бү оролдогты, тэдэ гуримууд хүнүүдтэ ямаршые аша туһагүй байгаа, харин Бурханай хайра үршөөлөөр сэдхэл зүрхэнтнай бэхижэбэл хайн гээшэ.

<sup>10</sup> Майханда алба хэжэ байһан санаартад үргэлэй шэрээ дээрэхэ манай үргэнэн юумэнһээ абажа эдихэ эрхэгүй юм. <sup>11</sup> Ушарынь юун бэ гэхэдэ, ахамад санаарта амитадай шуһые нүгэлнүүдэй түлөө үргэхээ Хамагай Нангин газарта абажа ородог, тиихэдэнь амитадай бээнүүдые отогоо гаргаад шатаадаг юм. <sup>12</sup> Тиимэһээ Иисусые арад зоноо шуһаараа арюудхахын тула хотоһоо гаргуулжа үхэнэн байгаа. <sup>13</sup> Бидэшые тэрэниие угтан хотоһоо гаража, доромжолуулгыень хубаалсаял. <sup>14</sup> Бидэ газар дэлхэй дээрэ хододоо оршодог хотогүйбди, бидэ ерээдүйн хото бэдэржэ байнабди. <sup>15</sup> Тиимэһээ Иисусаар дамжуулан магтаалай үргэл Бурханда хододоо асаржа байял, тэрэниие Дээдын Эзэн гэжэ зүбшөөн үрээлээрээ үргэл асаржа байял. <sup>16</sup> Хайниие хэжэ, бэе бээдээ туһалхые бү мартагты. Эдэ болбол Бурханда хайшаагдадаг үргэл гээшэ.

<sup>17</sup> Өөһэдынгөө хүтэлэгшэдэй мэдэлдэ байгты, захиралтануудыень дүүргэжэ байгты. Тэдэнэр һүүлдэнь алба хэһэн тухайгаа Бурханай урда тоосоо хэхэ ёһотой юм хадаа танай зүрхэ сэдхэлдэ үргэлжэ ханаагаа табидаг юм. Хэрбээ таанадай хүтэлэгшэдэйнгөө үгөөр байбалтнай, тэдэнэр баяртайгаар ажалаа хэхэ, үгы болбол, тэдэнэр гунигтайгаар үүргээ дүүргэжэ байха, тиимэ ажал хэрэгынь таанадта ашаг туһагүй юм.

<sup>18</sup> Үргэлжэ зүб юумые хэхэ гэжэ оролдон, арюун сэдхэлтэй байнабди гэжэ бидэ өөһэд тухайгаа найданабди. Тиимэһээ бидэнэй түлөө зальбаржал байгты. <sup>19</sup> Илангаяа, таанадта түргэн бусажа ошохымни түлөө бүри хайса зальбархыетнай гуйнаб.

*Түгэхэлэй зальбаралга*

<sup>20-21</sup> Өөрынгөө шуһанай сэнгээр мүнхын хэлсээе оложо абанан хонидой агуухэ Адуулагшые, Манай Дээдын Эзэн Иисусые Бурхан амидыруулаа юм. Энхэ тайбанай эрхэ хүсэлыень таанадай бэлүүлхын тула Бурхан таанадые хэрэгтэй хайн хайхан юумээр хангаг лэ, тиин өөртэнь хайшаагдадаг юумые Иисус Христосоор дамжуулан таанад соо бүтээг лэ. Христосто хэтын хэтэдэ алдар соло! Болтогой!

*Түгэсхэлэй үгэнүүд*

<sup>22</sup> Аха дүүнэрни, энэ урмашуулха зорилготой хандалга би тобшо-  
хоноор бэшээб, тиимэхээ тэсэбэритэйгээр шагнажа хайрлыт даа.

<sup>23</sup> Манай дүү Тимофей түрмэхөө гараа гэжэ мэдэжэ байгты. Хэр-  
бээ тэрэнэй хаяар хүрэжэ ерэбэлнь, би тэрээнтэй хамта таанадаа  
эрьехэб.

<sup>24</sup> Өөхэдынгөө бүлгэмүүдэй хүтэлэгшэдтэ болон Бурханай хүнүүдтэ  
бултандань бидэнхээ мэндые дамжуулаарайгты. Италиин хүзэглэг-  
шэд таанадта баһал мэндые дамжуулжа байна.

<sup>25</sup> Та бүхэнтэй Бурханай үршөөл хайра байхань болтогой.